



謙卑

這站仔上蓋時行的臺語詞應該就是「謙卑」啦！今年新當選、免佬久就欲就任的蔡英文總統佇宣佈當選彼暗，就要求個的競選團隊講：「歡喜一下仔就好，繼落去著愛謙卑、謙卑、閣再謙卑。」予濟濟的人聽著足感心的。

俗語講：「囂排無落魄的久。」無毋著，咱做人著愛謙卑較會得人疼，和人較好做伙。無論是個人抑是團體，攏是有時起、有時落，起起落落是真四常的代誌。無永遠的第一名，就親像無永遠的當權者。有謙卑的心，才會曉檢討、求進步，事事項項嘛才會符合公平恰正義。

當然，咱人一出世就是攏無全款的，生做無全、智能無全、身世嘛無全。有人聰明伶俐、有人含金湯匙來出世，毋過，絕大多數的人就無遐爾仔好命，濟濟人攏會是平平凡凡，手面趁食的人。總是，出身好的人若傷過頭聳勢，無定著免佬久就會落衰。咱這代人，就看過袂少的現世報。毋才有「一代儉腸凹肚，二代看錢若塗，三代當罔賣某。」這款的講法。

古早人講：「扛轎的都無雙重才。」就是咧講以早連扛轎遮爾簡單的代誌，倚毋著位，扛著嘛是會捩捩袂自然。有人嘛講：「一人勢一項，無兩人勢相全。」當今社會上真濟有頭有面、博士博的勢人，嘛無逐項會，一下無拄好失覺察，嘛是會予無讀過佬濟冊的諛仙仔，諛欲規千萬去，敢毋是咧？

謙卑毋但是對人爾爾。佇進步的社會，連對精牲仔嘛全款著愛謙卑。對咱生存的大自然恰生態環境，嘛著愛有謙卑的態度。以早咱接受的『人為萬物之靈』、『人定勝天』……這類的教育，攏總有需要重閣檢討過。恰咱人類生活關係誠深的水、空氣、氣象、物種……濟濟攏毋是咱有法度掌握的。咱這代人不時會搪著的核能災變、大海漲、大地動……，定定攏毋是咱人會當對抗的。

總是，時代無全矣！過去檯面上的大肝大肱、喝水會堅凍的人，莫看袂起少年人，嘛毋通閣遐爾厚沙屑、厚譴損，著愛較謙卑咧，莫看貓的無點，因為少年人的時代真正來臨矣。

作者：陳憲國

☆詞彙學習☆

【感心】kám-sim：感動。

【囂排】hiau/hia-pai：囂張、驕傲。

【四常】sù-siông：時常、經常。

【生做】senn-tsò/sinn-tsuè：天生的。

【手面趁食的人】tshiú-bīn-thàn-tsiáh ê

lâng：指靠勞力、小生意討生活者。

【捩捩】khê-khê：不通順、不順暢。

【聳勢】sáng-sè 高傲神氣，作威作福的樣

子。

【以早】í-tsá：早先，以前。

【大海漲】tuā-hái-tiòng：大海嘯。

【大肝大肱】tuā-kuann-tuā-kiān：泛指位高權重者。

【厚沙屑】kāu-sua-sap：囉嗦又挑剔，很難伺候。

【厚譴損】kāu-khiàn-sng：迷信、忌諱多。